

## Kulussiyon

<sup>1</sup> Yih khat Paulus kī taraf se hai jo Allāh kī marzī se Masīh Īsā kā rasūl hai. Sāth hī yih bhāi Tīmuthiyus kī taraf se bhī hai.

<sup>2</sup> Maiñ Kulusse Shahr ke muqaddas bhāiyon ko likh rahā hūn jo Masīh par imān lāe haiñ:

Ḳhudā hamārā Bāp āp ko fazl aur salāmatī baḳhshe.

### *Shukrguzārī kī Duā*

<sup>3</sup> Jab ham āp ke lie duā karte haiñ to har waqt Ḳhudā apne Ḳhudāwand Īsā Masīh ke Bāp kā shukr karte haiñ, <sup>4</sup> kyoñki ham ne āp ke Masīh Īsā par imān aur āp kī tamām muqaddasīn se muhabbat ke bāre meñ sun liyā hai. <sup>5</sup> Āp kā yih imān aur muhabbat wuh kuchh zāhir karte haiñ jis kī āp ummīd rakhte haiñ aur jo āsmān par āp ke lie mahfūz rakhā gayā hai. Aur āp ne yih ummīd us waqt se rakhī hai jab se āp ne pahlī martabā sachchāi kā kalām yānī Allāh kī ḳhushḳhabrī sunī. <sup>6</sup> Yih paighām jo āp ke pās pahuñch gayā pūrī duniyā meñ phal lā rahā aur baḳh rahā hai, bilkul usī tarah jis tarah yih āp meñ bhī us din se kām kar rahā hai jab āp ne pahlī bār ise sun kar Allāh ke fazl kī pūrī haqīqat samajh lī. <sup>7</sup> Āp ne hamāre azīz hamḳhidmat Ipafrās se is ḳhushḳhabrī kī tālīm pā lī thī. Masīh kā yih wafādār ḳhādim hamārī jagah āp kī ḳhidmat kar rahā hai. <sup>8</sup> Usī ne hameñ āp kī

us muhabbat ke bāre meñ batāyā jo Rūhul-quds ne āp ke dilon meñ dāl dī hai.

<sup>9</sup> Is wajah se ham āp ke lie duā karne se bāz nahīn āe balki yih māngte rahte haiñ ki Allāh āp ko har ruhānī hikmat aur samajh se nawāz kar apnī marzī ke ilm se bhar de. <sup>10</sup> Kyonki phir hī āp apnī zindagī Ḳhudāwand ke lāyq guzār sakeñge aur har tarah se use pasand āeñge. Hāñ, āp har qism kā achchhā kām karke phal lāeñge aur Allāh ke ilm-o-irfān meñ taraqqī kareñge. <sup>11</sup> Aur āp us kī jalālī qudrat se milne wālī har qism kī quwwat se taqwiyat pā kar har waqt sābitqadmī aur sabar se chal sakeñge. Āp ḳhushī se <sup>12</sup> Bāp kā shukr kareñge jis ne āp ko us mīrās meñ hissā lene ke lāyq banā diyā jo us ke raushnī meñ rahne wāle muqaddasīn ko hāsil hai. <sup>13</sup> Kyonki wuhī hameñ tārīkī ke iḳhtiyār se rihāi de kar apne pyāre Farzand kī bādshāhī meñ lāyā, <sup>14</sup> us wāhid shaḳhs ke iḳhtiyār meñ jis ne hamārā fidyā de kar hamāre gunāhoñ ko muāf kar diyā.

### *Masīh kī Shaḳhsiyat aur Kām*

<sup>15</sup> Allāh ko dekhā nahīn jā saktā, lekin ham Masīh ko dekh sakte haiñ jo Allāh kī sūrat aur kāynāt kā pahlauṭhā hai. <sup>16</sup> Kyonki Allāh ne usī meñ sab kuchh ḳhalaq kiyā, ḳhāh āsmān par ho yā zamīn par; āñkhoñ ko nazar āe yā na, ḳhāh shāhī taḳht, quwwateñ, hukmrān yā iḳhtiyār wāle hūñ. Sab kuchh Masīh ke zariye aur usī ke lie ḳhalaq huā. <sup>17</sup> Wuhī sab chīzoñ se pahle hai aur usī meñ sab kuchh qāym rahtā hai. <sup>18</sup> Aur wuh badan yānī apnī jamāt kā sar bhī hai. Wuhī ibtidā hai, aur chūñki pahle wuhī murdoñ

meñ se jī uṭhā is lie wuhī un meñ se pahlauṭhā bhī hai tāki wuh sab bātoñ meñ awwal ho. <sup>19</sup> Kyoñki Allāh ko pasand āyā ki Masīh meñ us kī pūrī māmūrī sukūnat kare <sup>20</sup> aur wuh Masīh ke zariye sab bātoñ kī apne sāth sulah karā le, ḳhāh wuh zamīn kī hūñ ḳhāh āsmān kī. Kyoñki us ne Masīh ke salīb par bahāe gae ḳhūn ke wasīle se sulah-salāmatī qāym kī.

<sup>21</sup> Āp bhī pahle Allāh ke sāmne ajnabī the aur dushman kī-sī soch rakh kar bure kām karte the. <sup>22</sup> Lekin ab us ne Masīh ke insānī badan kī maut se āp ke sāth sulah kar lī hai tāki wuh āp ko muḳaddas, bedāgh aur be'īlzām hālat meñ apne huzūr khaṛā kare. <sup>23</sup> Beshak ab zarūrī hai ki āp imān meñ qāym raheñ, ki āp ṭhos buniyād par mazbūtī se khaṛe raheñ aur us ḳhushḳhabrī kī ummīd se haṭ na jāeñ jo āp ne sun lī hai. Yih wuhī paighām hai jis kī munādī duniyā meñ har maḳhlūq ke sāmne kar dī gai hai aur jis kā ḳhādīm main Paulus ban gayā hūñ.

### *Jamāt ke Ḳhādīm kī Haisiyat se Paulus kī Ḳhidmat*

<sup>24</sup> Ab main un dukhoñ ke bāis ḳhushī manātā hūñ jo main āp kī ḳhātir uṭhā rahā hūñ. Kyoñki main apne jism meñ Masīh ke badan yānī us kī jamāt kī ḳhātir Masīh kī musībatoñ kī wuh kamiyāñ pūrī kar rahā hūñ jo ab tak rah gai haiñ. <sup>25</sup> Hāñ, Allāh ne mujhe apnī jamāt kā ḳhādīm banā kar yih zimmedārī dī ki main āp ko Allāh kā pūrā kalām sunā dūñ, <sup>26</sup> wuh rāz jo azal se tamām guzarī nasloñ se poshīdā rahā thā lekin ab muḳaddasīn par zāhir kiyā gayā hai. <sup>27</sup> Kyoñki Allāh chāhtā thā ki wuh jān leñ

ki Ġhairyahūdiyōn meñ yih rāz kitnā beshqīmat aur jalālī hai. Aur yih rāz hai kyā? Yih ki Masīh āp meñ hai. Wuhī āp meñ hai jis ke bāis ham Allāh ke jalāl meñ sharīk hone kī ummīd rakhte haiñ. <sup>28</sup> Yoñ ham sab ko Masīh kā paighām sunāte haiñ. Har mumkinā hikmat se ham unheñ samjhāte aur tālīm dete haiñ tāki har ek ko Masīh meñ kāmīl hālat meñ Allāh ke huzūr pesh karen. <sup>29</sup> Yihī maqsad pūrā karne ke lie main sakht mehnat kartā hūñ. Hāñ, main pūrī jidd-o-jahd karke Masīh kī us quwwat kā sahārā letā hūñ jo baṛe zor se mere andar kām kar rahī hai.

## 2

<sup>1</sup> Main chāhtā hūñ ki āp jān leñ ki main āp ke lie kis qadar jāñfishānī kar rahā hūñ—āp ke lie, Laudīkiyā wāloñ ke lie aur un tamām imāndāroñ ke lie bhī jin kī mere sāth mulāqāt nahīn huī. <sup>2</sup> Merī koshish yih hai ki un kī dilī hauslā-afzāī kī jāe aur wuh muhabbat meñ ek ho jāeñ, ki unheñ wuh ṭhos etamād hāsil ho jāe jo pūrī samajh se paidā hotā hai. Kyonki main chāhtā hūñ ki wuh Allāh kā rāz jān leñ. Rāz kyā hai? Masīh khud. <sup>3</sup> Usī meñ hikmat aur ilm-o-irfān ke tamām khazāne poshidā haiñ.

<sup>4</sup> Ġharz khabardār raheñ ki koī āp ko bazāhir sahīh aur mīṭhe mīṭhe alfāz se dhokā na de. <sup>5</sup> Kyonki go main jism ke lihāz se hāzir nahīn hūñ, lekin Rūh meñ main āp ke sāth hūñ. Aur main yih dekh kar khush hūñ ki āp kitnī munazzam zindagī guzārte haiñ, ki āp kā Masīh par imān kitnā puṅhtā hai.

### *Masīh meñ Zindagī*

<sup>6</sup> Āp ne Īsā Masīh ko Ḳhudāwand ke taur par qabūl kar liyā hai. Ab us meñ zindagī guzāreñ. <sup>7</sup> Us meñ jaṛ pakāreñ, us par apnī zindagī tāmīr kareñ, us imān meñ mazbūt raheñ jis kī āp ko tālīm dī gaī hai aur shukrguzārī se labrez ho jāeñ.

<sup>8</sup> Muhtāt raheñ ki koī āp ko falsafiyānā aur mahz fareb dene wālī bātoñ se apne jāl meñ na phaṅsā le. Aisī bātoñ kā sarchashmā Masīh nahīn balki insānī riwāyateñ aur is duniyā kī quwwateñ haiñ. <sup>9</sup> Kyonki Masīh meñ ulūhiyat kī sārī māmūrī mujassam ho kar sukūnat kartī hai. <sup>10</sup> Aur āp ko jo Masīh meñ haiñ us kī māmūrī meñ sharīk kar diyā gayā hai. Wuhī har hukmrān aur iḳhtiyār wāle kā sar hai.

<sup>11</sup> Us meñ āte waqt āp kā ḳhatnā bhī karwāyā gayā. Lekin yih ḳhatnā insānī hāthoñ se nahīn kiyā gayā balki Masīh ke wasīle se. Us waqt āp kī purānī fitrat utār dī gaī, <sup>12</sup> āp ko baptismā de kar Masīh ke sāth dafnāyā gayā aur āp ko imān se zindā kar diyā gayā. Kyonki āp Allāh kī qudrat par imān lāe the, usī qudrat par jis ne Masīh ko murdoñ meñ se zindā kar diyā thā. <sup>13</sup> Pahle āp apne gunāhoñ aur nāmaḳhtūn jismānī hālat ke sabab se murdā the, lekin ab Allāh ne āp ko Masīh ke sāth zindā kar diyā hai. Us ne hamāre tamām gunāhoñ ko muāf kar diyā hai. <sup>14</sup> Hamāre qarḳ kī jo rasīd apnī sharāyt kī binā par hamāre ḳhilāf thī use us ne mansūḳh kar diyā. Hāñ, us ne ham se dūr karke use kīloñ se salīb par jaṛ diyā. <sup>15</sup> Us ne hukmrānoñ aur

ikhtiyār wālon se un kā aslāh chhīn kar sab ke sāmne un kī ruswāi kī. Hān, Masīh kī salībī maut se wuh Allāh ke qaidī ban gae aur unheñ fatah ke julūs meñ us ke pīchhe pīchhe chalnā paṛā.

<sup>16</sup> Chunānche koī āp ko is wajah se mujrim na ṭhahrāe ki āp kyā kyā khāte-pīte yā kaun kaun-sī īdeñ manāte haiñ. Isī tarah koī āp kī adālat na kare agar āp Hilāl kī Īd yā Sabat kā din nahīn manāte. <sup>17</sup> Yih chīzeñ to sirf āne wālī haqīqat kā sāyā hī haiñ jabki yih haqīqat ḳhud Masīh meñ pāī jāti hai. <sup>18</sup> Aise log āp ko mujrim na ṭhahrāeñ jo zāhirī farotanī aur farishton kī pūjā par isrār karte haiñ. Baṛī tafsīl se apnī royāon meñ dekhī huī bāteñ bayān karte karte un ke ḡhairrūhānī zahan ḳhāhmaḳhāh phūl jāte haiñ. <sup>19</sup> Yoñ unhoñ ne Masīh ke sāth lage rahnā chhoṛ diyā agarche wuh badan kā sar hai. Wuhī joṛon aur paṭṭhon ke zariye pūre badan ko sahārā de kar us ke muḳhtalif hisson ko joṛ detā hai. Yoñ pūrā badan Allāh kī madad se taraqqī kartā jāta hai.

### *Masīh ke sāth Marnā aur Zindagī Guzārnā*

<sup>20</sup> Āp to Masīh ke sāth mar kar duniyā kī kuwwaton se āzād ho gae haiñ. Agar aisā hai to āp zindagī aise kyon guzārte haiñ jaise ki āp abhī tak is duniyā kī milkiyat haiñ? Āp kyon is ke ahkām ke tābe rahte haiñ? <sup>21</sup> Masalan “Ise hāth na lagānā, wuh na chakhnā, yih na chhūnā.” <sup>22</sup> In tamām chīzon kā maqsad to yih hai ki istemāl ho kar ḳhatm ho jāeñ. Yih sirf insānī ahkām aur tālīmāt haiñ. <sup>23</sup> Beshak yih

ahkām jo ghare hue mazhabī farāyẓ, nām-nihād farotanī aur jism ke saḡht dabāw kā taqāzā karte haiñ hikmat par mabnī to lagte haiñ, lekin yih bekār haiñ aur sirf jism hī kī ḡhāhishāt pūrī karte haiñ.

### 3

<sup>1</sup> Āp ko Masīh ke sāth zindā kar diyā gayā hai, is lie wuh kuchh talāsh karen jo āsmān par hai jahāñ Masīh Allāh ke dahne hāth baiṭhā hai. <sup>2</sup> Duniyāwī chīzon ko apne ḡhayālon kā markaz na banāen balki āsmānī chīzon ko. <sup>3</sup> Kyoñki āp mar gae haiñ aur ab āp kī zindagī Masīh ke sāth Allāh meñ poshīdā hai. <sup>4</sup> Masīh hī āp kī zindagī hai. Jab wuh zāhir ho jāegā to āp bhī us ke sāth zāhir ho kar us ke jalāl meñ sharīk ho jāenge.

#### *Purānī aur Naī Zindagī*

<sup>5</sup> Chunānche un duniyāwī chīzon ko mār ḡaleñ jo āp ke andar kām kar rahī haiñ: zinākārī, nāpākī, shahwatparastī, burī ḡhāhishāt aur lālach. (Lālach to ek qism kī butparastī hai.) <sup>6</sup> Allāh kā ḡhazab aisī hī bāton kī wajah se nāzil hogā. <sup>7</sup> Ek waqt thā jab āp bhī in ke mutābiq zindagī guzārte the, jab āp kī zindagī in ke qābū meñ thī.

<sup>8</sup> Lekin ab waqt ā gayā hai ki āp yih sab kuchh yāñī ḡhussā, taish, badsulūkī, buhtān aur gandī zabān ḡhastāhāl kapre kī tarah utār kar phaiñk deñ. <sup>9</sup> Ek dūsre se bāt karte waqt jhūṭ mat bolnā, kyoñki āp ne apnī purānī fitrat us kī harkaton samet utār dī hai. <sup>10</sup> Sāth sāth āp ne naī fitrat pahan lī hai, wuh fitrat jis kī tajdīd hamārā

Ḳhāliq apnī sūrat par kartā jā rahā hai tāki āp use aur behtar taur par jān leñ. <sup>11</sup> Jahān yih kām ho rahā hai wahāñ logoñ meñ koī farq nahīn hai, ḳhāh koī Ġhairyahūdī ho yā Yahūdī, maḳhtūn ho yā nāmaḳhtūn, Ġhairiyūnānī ho yā Skūtī, \* ḡhulām ho yā āzād. Koī farq nahīn paṛtā, sirf Masīh hī sab kuchh aur sab meñ hai.

<sup>12</sup> Allāh ne āp ko chun kar apne lie maḳhsūs-o-muḳaddas kar liyā hai. Wuh āp se muhabbat rakhtā hai. Is lie ab tars, nekī, farotanī, narmdilī aur sabar ko pahan leñ. <sup>13</sup> Ek dūsre ko bardāsht karen, aur agar āp kī kisī se shikāyat ho to use muāf kar deñ. Hāñ, yoñ muāf karen jis tarah Ḳhudāwand ne āp ko muāf kar diyā hai. <sup>14</sup> In ke alāwā muhabbat bhī pahan leñ jo sab kuchh bāndh kar kāmiliyat kī taraf le jātī hai. <sup>15</sup> Masīh kī salāmatī āp ke dilon meñ hukūmat kare. Kyoñki Allāh ne āp ko isī salāmatī kī zindagī guzārne ke lie bulā kar ek badan meñ shāmil kar diyā hai. Shukrguzār bhī raheñ. <sup>16</sup> Āp kī zindagī meñ Masīh ke kalām kī pūrī daulat ghar kar jāe. Ek dūsre ko har tarah kī hikmat se tālīm dete aur samjhāte raheñ. Sāth sāth apne dilon meñ Allāh ke lie shukrguzārī ke sāth zabūr, hamd-o-sanā aur ruhānī gīt gāte raheñ. <sup>17</sup> Aur jo kuchh bhī āp karen ḳhāh zabānī ho yā amlī wuh Ḳhudāwand Īsā kā nām le kar karen. Har kām meñ usī ke wasīle se Ḳhudā Bāp kā shukr karen.

### *Nāi Zindagī meñ Tālluqāt Kaise Hūn*

---

\* **3:11** Ek qabilā jo zalil samjhā jātā thā.

<sup>18</sup> Bīwiyo, apne shauhar ke tābe raheñ, kyoñki jo Ḳhudāwand meñ hai us ke lie yihī munāsib hai.

<sup>19</sup> Shauharo, apnī bīwiyon se muhabbat rakheñ. Un se talḳhmizājī se pesh na aeñ.

<sup>20</sup> Bachcho, har bāt meñ apne māñ-bāp ke tābe raheñ, kyoñki yihī Ḳhudāwand ko pasand hai.

<sup>21</sup> Wālıdo, apne bachchoñ ko mushta'il na kareñ, warnā wuh bedil ho jāenge.

<sup>22</sup> Ġhulāmo, har bāt meñ apne duniyāwī mālıkoñ ke tābe raheñ. Na sirf un ke sāmne hī aur unheñ ḳhush rakhne ke lie ḳhidmat kareñ balki ḳhulūsdilī aur Ḳhudāwand kā ḳhauf māñ kar kām kareñ. <sup>23</sup> Jo kuchh bhī āp karte haiñ use pūrī lagan ke sāth kareñ, is tarah jaisā ki āp na sirf insānoñ kī balki Ḳhudāwand kī ḳhidmat kar rahe hūñ. <sup>24</sup> Āp to jānte haiñ ki Ḳhudāwand āp ko is ke muāwaze meñ wuh mirās degā jis kā wādā us ne kiyā hai. Haqīqat meñ āp Ḳhudāwand Masīh kī hī ḳhidmat kar rahe haiñ. <sup>25</sup> Lekin jo ġhalat kām kare use apnī ġhaltiyon kā muāwazā bhī milegā. Allāh to kisī kī bhī jānibdārī nahīñ kartā.

## 4

<sup>1</sup> Mālıko, apne ġhulāmoñ ke sāth munsifānā aur jāyz sulūk kareñ. Āp to jānte haiñ ki āsmān par āp kā bhī mālik hai.

### *Hidāyāt*

<sup>2</sup> Duā meñ lage raheñ. Aur duā karte waqt shukrguzārī ke sāth jāgte raheñ. <sup>3</sup> Sāth sāth hamāre lie bhī duā kareñ tāki Allāh hamāre lie kalām sunāne kā darwāzā khole aur ham Masīh

kā rāz pesh kar sakeñ. Ākhir main isī rāz kī wajah se qaid meñ hūñ. <sup>4</sup> Duā karen ki main ise yoñ pesh karūñ jis tarah karnā chāhie, ki ise sāf samjhā jā sake.

<sup>5</sup> Jo ab tak īmān na lāe hoñ un ke sāth dānishmandānā sulūk karen. Is silsile meñ har mauqe se fāydā uṭhāeñ. <sup>6</sup> Āp kī guftgū har waqt mehrbān ho, aisī ki mazā āe aur āp har ek ko munāsib jawāb de sakeñ.

### *Ākhirī Salām-o-Duā*

<sup>7</sup> Jahāñ tak merā tālluq hai hamārā azīz bhāi Tuḡhikus āp ko sab kuchh batā degā. Wuh ek wafādār ḡhādīm aur ḡhudāwand meñ hamḡhidmat rahā hai. <sup>8</sup> Main ne use ḡhāskar is lie āp ke pās bhej diyā tāki āp ko hamārā hāl mālūm ho jāe aur wuh āp kī hauslā-afzāi kare. <sup>9</sup> Wuh hamāre wafādār aur azīz bhāi Unešimus ke sāth āp ke pās ā rahā hai, wuhī jo āp kī jamāt se hai. Donoñ āp ko wuh sab kuchh sunā deñge jo yahāñ ho rahā hai.

<sup>10</sup> Aristarḡhus jo mere sāth qaid meñ hai āp ko salām kahtā hai aur isī tarah Barnabās kā kazan \* Marḡus bhī. (Āp ko us ke bāre meñ hidāyāt dī gāi haiñ. Jab wuh āp ke pās āe to use ḡhushāmdīd kahnā.) <sup>11</sup> Isā jo Yūstus kahlātā hai bhī āp ko salām kahtā hai. Un meñ se jo mere sāth Allāh kī bādshāhī meñ ḡhidmat kar rahe haiñ sirf yih tīn mard Yahūdī haiñ. Aur yih mere lie tasallī kā bāis rahe haiñ.

<sup>12</sup> Masīh Isā kā ḡhādīm Ipafrās bhī jo āp kī jamāt se hai salām kahtā hai. Wuh har waqt baḡī

---

\* **4:10** Yūnānī lafz se zāhir nahīñ hotā ki Marḡus chachā, māmūñ, phūphī yā ḡhālā kā laḡkā hai.

jidd-o-jahd ke sāth āp ke lie duā kartā hai. Us kī ḡhās duā yih hai kī āp mazbūtī ke sāth ḡhaṛe raheñ, ki āp bāligh Masīhī ban kar har bāt meñ Allāh kī marzī ke mutābiq chaleñ. <sup>13</sup> Maiñ ḡhud is kī tasdiq kar saktā hūñ ki us ne āp ke lie saḡht mehnat kī hai balki Laudīkiyā aur Hiyarāpulis kī jamātoñ ke lie bhī. <sup>14</sup> Hamāre azīz ḡāḡḡar Lūḡā aur Demās āp ko salām kahte haiñ.

<sup>15</sup> Merā salām Laudīkiyā kī jamāt ko denā aur isī tarah Numfās ko us jamāt samet jo us ke ḡhar meñ jamā hotī hai. <sup>16</sup> Yih paṛhne ke bād dhyān deñ ki Laudīkiyā kī jamāt meñ bhī yih ḡhat paṛhā jāe aur āp Laudīkiyā kā ḡhat bhī paṛheñ. <sup>17</sup> Arkḡhippus ko batā denā, ḡhabardār kī āp wuh ḡhidmat takmīl tak pahuñchāeñ jo āp ko ḡhudāwand meñ sauñpī gāi hai.

<sup>18</sup> Maiñ apne hāth se yih alfāz likh rahā hūñ. Merī yāñī Paulus kī taraf se salām. Merī zanḡireñ mat bhūlnā! Allāh kā fazl āp ke sāth hotā rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-30

---

PDF generated using Haiola and XeLaTeX on 22 Feb 2024 from source files dated 13 Dec 2023

123ff8cb-27b3-5817-a02a-22e67145fd30